

# SEHARI DI INDONESIA

## Orang-orang Cina; “Yahudi timur Jauh”!

Rancangan ini ialah catitan al-Ustādh “Sa‘īd Ramaḍān” yang baharu-baharu ini telah disiarkan di dalam majalahnya

“*al-Muslimūn*” – P. Q.

Pada pagi-pagi lagi saya telah mengemaskan barang-barang yang perlu saya bawa belayar ke Bukit Tinggi – Sumatera Tengah. Sebentar kemudian tiba saudara Ali Sunkar tuan punya rumah tumpangan yang saya tinggal di dalamnya, bersama-sama anaknya Mustafa anak muda yang berbudi itu. Kami pun bersama-sama beberapa orang saudara yang lain terus berangkat ke padang terbang dan seketika kemudian kapal terbang yang membawa kami pun melayang ke udara dengan meninggalkan Jakarta lalu menuju ke Bandar “Padang” Minangkabau.

Jauhnya perjalanan-dari Jakarta ke Padang-menurut yang dikhabarkan kepada saya ialah di jam setengah, yakni lebih jauh daripada perjalanan di antara Kaherah dengan Dimashq. Saya perhati penumpang-penumpang adalah campuran daripada berbagai-bagai bangsa; Indonesia ada, Amerika ada, Cina pun ada. Orang-orang Cina ini ialah Yahudi Timur jauh dalam dunia iktisad, meskipun di Indonesia hanya ada dua juta bangsa Cina tetapi kebanyakan pasar-pasar perniagaan di sana dibolot oleh mereka!

Penumpang yang duduk di sebelah saya ialah seorang *American*, tinggi orangnya dan banyak bercakap. Orang-orang *American* di Indonesia negara yang kaya raya itu makin sehari makin bertambah jumlahnya; tiap-tiap kali turun kapal terbang di Jakarta melainkan ada orang-orang *American* di antara penumpang-penumpangnya. Baik ia orang baharu atau pun orang lama, yang baharu balik setelah menghabiskan cutinya di Amerika.

Termenung panjang saya memikirkan bagaimana cerdik pandai orang-orang Islam telah mencuaikan perkara perhubungan

iktisad di antara negara-negara mereka masing-masing. Hati saya pula sangat-sangat tertarik memikirkan keikhlasan orang-orang yang bukan Islam dalam menyembah kepentingan dunia mereka sehingga tahan merantau dan tahan menderita. Demikian juga hati saya sangatlah sebal dan sedih mengenangkan sikap lembab orang-orang Islam dan perasaan dungu yang telah menjadikan mereka ibarat tunggangan, ditunggang oleh siapa-siapa sahaja. Pada hal datuk nenek mereka dahulu pengembara-pengembara yang berani yang telah merantau di segenap pelosok dunia; Islam telah masuk ke Indonesia adalah dibawa oleh saudagar-saudagar Islam-Iran dan Hindi ahli perantauan yang bercerai nikah. Saya percaya benua Amerika telah didapati orang adalah disebabkan dorongan daripada kesan roh ilmu pengetahuan dan kepahlawanan yang telah dibangkitkan oleh sekolah-sekolah tinggi Islam di Spain ketika Eropah sedang merangkak di bawah kejahilan yang berlapis-lapis dan mendiami penduduk-penduduk buruk. Sungguh besar kesannya penangan peredaran zaman, dan sungguh besar penangan sifat lembab dan gelisah yang membunuh itu!!

## Gempar di Udara

Menungan saya ini telah terganggu oleh gerak kapal terbang yang telah mulai berbuai-buai dan bergoyang-goyang, sebentar naik dan sebentar turun seolah-olah hendak mengelak daripada bertembung dengan sesuatu benda. Sehingga kebanyakan penumpang-penumpang telah gempar, kebetulan pula langit pada ketika itu sedang mendung dan sebentar kemudian yang kami telah tenggelam di dalam awan

tebal yang menggerunkan.

Dalam masa itu mata saya tidak lepas memandangi ke bawah dari tinggi-pada hal kapal terbang itu sedang terbang setinggi 16 ribu kaki-dengan tujuan hendak mendapat celah dari awan yang telah berlapis-lapis itu, hendak mengetahui di mana kami sedang berada, dan di atas kemuncak gunung mana di antara gunung-ganang Indonesia serta di atas hutan mana pula kapal terbang kami akan jatuh kiranya sudah termaktub menurut takdir Tuhan bahawa perjalanan kami ini ialah perjalanan yang akhir. Hal yang demikian ini telah berkekalan sejam lamanya, akhirnya kapal terbang kami itupun keluar dalam lapangan udara terang benderang dan langit biru yang bersih, seolah-olah dia dengan tiba-tiba berjalan di atas permaidani lembut yang terhampar.

### **Di Bandar Padang**

Tidak berapa antaranya sampailah kami ke tempat yang dituju dan turunlah kapal terbang kami di Bandar Padang.

Saya dapati tiga orang dari parti Masyumi sedang menunggu saya, mereka itu ialah saudara Hassan Saruti, saudara 'Abd al-Qahār Muhyiddin dan saudara Rashid.

Saudara Hassan telah mula menyapa saya dengan bahasa Arab dengan berkata:

“Al-Ustādh Sa‘īd Ramaḍān?”

“Ya”

“Tuan Mohammad Natsir telah menghantar kawat memberitahu kedatangan tuan, selamat datang”.

Lalu dia mengenalkan dua orang rakannya itu kepada saya, kami pun pergi ke rumah tumpangan lalu makan tengah hari di sana. Makanan yang disajikan itu ialah makanan Indonesia sejati. Saya memang suka makanan Indonesia, makanan pedas yang membuka nafsu. Walaupun banyak jenisnya tetapi lekas hadam. Di Jakarta dahulu saya orang Mesir tetapi makanan itu telah menyusahkan saya (kerana kurang hadam).

Dengan itu mengetahuilah – bahawa kejadian ini boleh dijadikan nasihat dan panduan yang baik bagi orang-orang yang merantau dan mengembara ke sana ke mari-iaitu sangatlah elok kalau kita membiasakan diri dengan makanan yang sederhana yang lazim dimakan oleh penduduk suatu negeri kerana makanan yang demikian sesuai dengan keadaan alam di situ, sementelah pula makanan itu ialah hasil percubaan penduduk di situ setelah mereka menghabiskan masa yang lanjut, selain daripada dia suatu perkara yang telah dikaji dan diselidiki yang akan menjadikan tuan terasa dengan sebenar-benarnya akan keadaan iklim (suasana) yang tuan berada di dalamnya dan terasa akan perasaan kasih mesra dan bersefahaman dengan anak negeri di situ ketika tuan duduk bersama-sama mereka dan makan daripada apa yang mereka makan.

### **Suatu Peristiwa**

Terkenang saya suatu peristiwa pada suatu hari ketika saya di Pakistan, seorang sahabat saya di sana telah bertanya tentang jenis-jenis makanan Pakistan yang saya berkenan dan suka kepadanya. Saya pun sebutkan dua tiga jenis, di antaranya suatu jenis bernama “*Nahari*”. Nahari ini suatu masakan pedas daripada sum sum tulang. Rempah-trempah dan lain-lain lagi yang saya tidak tahu hendak menyebutnya. Dengan cara mengejut pada pagi-pagi hari esoknya sesudah sembahyang Subuh di masjid, sahabat saya itu telah datang menjemput saya ke rumahnya. Lalu dia menjemput tuan imam dan beberapa orang di antara makmun yang datang sembahyang pada hari itu. Setibanya di sana kamu dapati makanan yang telah disajikan untuk futur ialah “*Nahari*”.

Dengan tujuan hendak menghormati saya, tuan rumah telah menyajikan untuk saya satu mangkuk khas penuh dengan makanan itu lalu ditambahnya dengan rempah-rempah pedas. Saya pun makanlah dan kerana kepedasan, mata saya mulai menitikkan air mata. Dalam pada itu sahabat saya itu masih duduk

di hadapan saya, mendesak supaya saya jangan meninggalkan sisa makanan “*Nahari*” yang semangkuk terak itu. Sedang saya pada ketika itu berada dalam keadaan serba salah mengenang pengakuan saya kepadanya semalam yang saya terlalu gemar kepada makanan “*Nahari*” itu pada hal saya pada ketika itu sedang kepedasan kerana dia agaknya dengan tujuan menghormati saya telah melebihkan lada pedasnya.

### **Keindahan Alam Indonesia**

Lepas makan tengah hari kami pun berangkat dengan motokar ke bukit tinggi yang terletak kira-kira delapan puluh kilometer dari Padang. Lupa saya hendak menyebut bahawa kami sebelum itu telah singgah ke rumah Tuan Kiyai Ahmad Rashid Sutan Mansur wakil ketua pertubuhan “Muhammadiyah” seorang yang berjiwa besar dan lapang dada. Beliau telah menyambut kedatangan saya dengan perasaan kasih mesra yang saya telah terasa jalurnya meresap ke dalam segenap anggota saya. Demikian juga sambutan yang saya dapati daripada anak-anaknya yang berbudi. Pada ketika itu teringatlah saya akan anak saya “Iman” di Kaherah. Kiyai Sutan Mansur dalam perbualannya dengan saya berkata:

“Saya sentiasa membaca majalah “*Al-Muslimin*” pada tiap-tiap bulan, diberkati Allah akan tuan dan majalah tuan, sata sentiasa mengikuti gerakan al-Ikhwān al-Muslimīn, mudah mudahan Allah permuliakan agama dengan mereka”. Setelah memperbincangkan beberapa kejadian yang berlaku di Mesir dan di Indonesia maka saya pun memberi selamat tinggal kepada Tuan Kiyai yang berbudi itu sedang hati saya rasanya tidak mahu bercerai dengannya.

Motokar kami pun bergerak melalui jalan yang dinaungi oleh pokok-pokok yang rendang di kiri kanannya dan tanah-tanah kebun ladang yang menghijau indah menarik pandangan, di sebelah kanan jalan kelihatan bukit bukau dan gunung ganang yang dihiasi oleh hutan tebal tempat harimau, burung, rusa dan lain-lainnya. Di antara

perkara ganjil yang saya lihat dalam daerah “Duku” ialah tentang kera dan beruk. Setelah saya bertanya maka saya diberitahu bahawa binatang itu hidup jinak di antara orang ramai sama seperti hidup kucing di antara kita, iaitu digunakan oleh pekebun-pekebun di sana bagi memanjat dan memetik buah kelapa.

### **Bekas Kekejaman Belanda**

Setelah kami tiba di pasar usang, saya lihat sebuah batu peringatan di tengah-tengah pekan itu untuk mengingati suatu peristiwa yang sangat memuliakan hati dalam perjuangan anak-anak Indonesia menentang Belanda dahulu. Menurut yang dikhabarkan kepada saya, orang-orang Belanda telah mengebom pekan itu pada bulan Februari 1946 dan membunuh lebih daripada seribu orang penduduk di situ. Sebentar kemudian saya lihat runtunan rumah-rumah yang telah hapus di tengah-tengah alam yang indah permai di situ sebagai menunjukkan betapa kejamnya manusia dan perasaannya tidak mengenang budi!!

Pemandangan yang menyedihkan ini telah berulang-ulang saya melihatnya di sepanjang jalan itu, pada ketika itu terbayanglah sesudut daripada sejarah penderitaan saudara-saudara Islam dalam kawasan ini, saya pun bertuhan kepada Allah mudah mudahan dicucuri rahmatnya di atas saudara-saudara kita yang terkorban itu, dan disempurnakan kemuliaan dan kebebasan bagi umat Islam seluruhnya.

Apabila motokar kami melalui sebuah jabatan di atas Sungai Kiambang(?), teringatlah saya akan sungai “Bordi” di bandar Dimashq. Dari sana motokar kami telah melalui pekan “kayu tanam”. Sebuah sekolah yang mengajar muzik dan meukis telah didirikan oleh Tuan Muhammad Shafīʿ di sini. Sebenarnya keindahan alam yang mengelilingi tuan di sini adalah membisikkan kepada tuan dengan bisikan yang indah yang tak dapat digambarkan oleh seni lukis dan seni muzik.

(bersambung)